

BORRADOR DO PROXECTO DE DECRETO POLO QUE SE CREA A CATEGORÍA DE PERSOAL TÉCNICO EN FARMACIA NO ÁMBITO DO SERVIZO GALEGO DE SAÚDE.

No tempo transcorrido dende a creación do Servizo Galego de Saúde producíronse importantes cambios na atención sanitaria prestada nas súas institucións. O dereito á protección da saúde consagrado no artigo 43 da Constitución require dos poderes públicos unha constante adaptación das estruturas sanitarias ás novas necesidades, e a incorporación a ditas estruturas, cando sexa procedente, de persoal cunha formación profesional específica para a realización de determinadas funcións.

A Lei 5/1999, do 21 de maio, de ordenación farmacéutica de Galicia, prevé a realización de funcións de asistencia aos farmacéuticos por parte de persoal técnico ou auxiliar de farmacia. Por outra banda, as institucións sanitarias de Galicia contan con servizos de farmacia: no eido hospitalario, os servizos xerarquizados de farmacia hospitalaria; no nivel de primaria, os servizos de farmacia de atención primaria. Para a súa correcta xestión operativa parece adecuada a incorporación de persoal con formación específica para as funcións que se desenvolven nesas unidades.

O colectivo de persoal que se axusta a estes requirimentos de labor auxiliar nos ditos servizos de farmacia e ao perfil profesional axeitado para as institucións sanitarias do Organismo é o que acredita o Título de Técnico en Farmacia establecido polo Real Decreto 547/1995, do 7 abril (BOE nº 133, do 5 xuño), cuxa regulación foi recentemente substituída polo Real Decreto 1689/2007, do 14 de decembro (BOE do 17 de xaneiro de 2008), polo que se establece o título de Técnico en Farmacia e Parafarmacia e se fixan as súas ensinanzas mínimas.

En calquera caso, para fixar a titulación de acceso á nova categoría menciónase no presente Decreto a denominación fixada na primeira das disposicións citadas –Técnico en Farmacia–, sen prexuízo de atender ás equivalencias recoñecidas na disposición adicional terceira do propio Real Decreto 1689/2007 entre os títulos de Técnico Auxiliar de Farmacia, Técnico en Farmacia e Técnico en Farmacia e Parafarmacia.

A creación da nova categoría, en exercicio das competencias atribuídas nos artigos 14 e 15 da Lei 55/2003, do 16 de decembro, do Estatuto Marco do persoal estatutario dos servizos de saúde, resposta ao consenso existente na Mesa Sectorial de negociación respecto á necesidade de promover a incorporación de profesionais da área sanitaria con novas titulacións aos cadros de persoal das institucións sanitarias. Esta previsión, polo demais, xa

figuraba expresada no Acordo sobre mellora retributiva e profesional asinado o 1 de outubro de 2003 (DOG nº 232, do 28 de novembro). Polas institucións do Servizo Galego de Saúde advírtese tamén da necesidade de incorporar profesionais que teñan formación adecuada ás funcións que se realizan nas mesmas.

Por último, o presente Decreto atende á situación actual e traxectoria profesional do persoal que desempeña ou desempeñou as funcións atribuídas á nova categoría.

O presente Decreto dítase trala preceptiva negociación na Mesa Sectorial.

Na súa virtude, por proposta da consellería de Sanidade, de acordo co ditame núm. ..., do Consello Consultivo de Galicia e logo de deliberación no Consello da Xunta na súa reunión do día...,

DISPOÑO:

Artigo 1. Obxecto

Créase no Servizo Galego de Saúde, dentro do grupo de persoal sanitario de formación profesional, subgrupo de técnicos, a categoría estatutaria de persoal técnico en farmacia.

Artigo 2.- Réxime Xurídico

A relación do persoal desta categoría co Servizo Galego de Saúde regularase polo presente Decreto, pola Lei 55/2003, do 16 de decembro, do Estatuto Marco e a normativa de desenvolvemento e complementaria aplicable ao persoal estatutario do organismo.

En particular, a regulación da xornada de traballo e retribucións será a vixente para o persoal xa vinculado como persoal técnico sanitario de formación profesional.

Artigo 3.- Acceso

Para o acceso á categoría de persoal técnico en farmacia será requisito indispensable estar en posesión do título de técnico/a en farmacia (formación profesional da área sanitaria).

Entenderase cumprido este requisito cando se posúa calquera outro título declarado equivalente, nos termos previstos na normativa de ordenación xeral da formación profesional.

A superación das probas de selección, convocadas en execución dunha oferta pública de emprego, será requisito para acceder á condición de persoal estatutario fixo da categoría.

A selección de persoal temporal efectuarase polo procedemento establecido previa negociación na Mesa Sectorial.

Artigo 4.- Funcións

Corresponde ao persoal técnico en farmacia exercer, con carácter xeral, os servizos complementarios e de apoio das funcións que desenvolve o persoal facultativo farmacéutico dos servizos de farmacia das institucións sanitarias do Servizo Galego de Saúde. O ámbito funcional será o adecuado ás competencias e capacidades propias do título de técnico en farmacia.

As funcións desenvolveranse baixo a dirección do persoal farmacéutico que teña atribuída a responsabilidade do servizo e dando cumprimento ás instrucións do mesmo.

De xeito específico, o persoal técnico en farmacia desempeñará as seguintes actividades:

- 1.- Recepción, almacenamento, revisión e reposición de medicamentos, material de acondicionamento, produtos sanitarios, material sanitario e outro material utilizado nos servizos de farmacia, garantindo a súa correcta conservación e organización segundo os criterios establecidos.
- 2.- Colaborar na dispensación de medicamentos e produtos sanitarios nas súas diferentes modalidades (reposición de botiquíns, dispensación individualizada en doses unitarias, dispensación automatizada), así como realizar a preparación e distribución das solicitudes de medicamentos e produtos sanitarios, de acordo coas normas de actuación establecidas.
- 3.- Almacenamento, control e arquivo dos impresos e rexistros utilizados na recepción, almacenamento, conservación, custodia, dispensación e distribución de medicamentos, produtos sanitarios e demais produtos utilizados.

- 4.- Manexo, limpeza e conservación, mantemento do bo funcionamento e posta a punto do equipamento, utensilios e demais medios utilizados para a recepción, almacenamento, conservación, custodia, dispensación e distribución de medicamentos e produtos sanitarios.
- 5.- Preparar, por en funcionamento e controlar os utensilios de dosificación e envasado de medicamentos co obxecto da súa dispoñibilidade en cantidade, calidade e estado operativo no momento de ser requiridos.
- 6.- Colaborar, baixo a supervisión do persoal farmacéutico, na elaboración e control de calidade das preparacións farmacéuticas, segundo os procedementos establecidos de acordo coas normas de correcta elaboración e control de calidade.
- 7.- Almacenamento, control e arquivo das preparacións farmacéuticas e dos seus rexistros.
- 8.- Mantemento, conservación e limpeza dos utensilios e material requirido para levar a cabo operacións farmacéuticas.
- 9.- Colaborar no cumprimento dos principios do sistema de xestión da calidade establecido no servizo de farmacia.
- 10.- Manexo de aplicativos informáticos empregados no almacenamento e dispensación de medicamentos.
- 11.- Calesquera outras actividades que sexan iniciadas, como consecuencia das innovacións tecnolóxicas e organizativas, dentro das competencias e capacidades propias do título de técnico en farmacia.
- 12.- Todas aquelas outras funcións ás que habilite o seu currículo formativo no seu ámbito funcional.

O ámbito funcional da categoría estenderase así mesmo ás funcións previstas para o persoal auxiliar de enfermería das unidades de farmacia no estatuto do persoal sanitario non facultativo aprobado por Orde do 26 de abril de 1973.

O persoal técnico en farmacia desenvolverá as súas funcións sen menoscabo da competencia, capacidade de supervisión, responsabilidade e autonomía dos

profesionais sanitarios doutras categorías que actúan no ámbito propio dos servizos de farmacia.

Artigo 5.- Cadro de persoal

Correspóndelle ao Servizo Galego de Saúde determinar o número de efectivos de persoal da nova categoría que poden prestar servizos con carácter estrutural. Esta medida farase efectiva mediante as modificacións que procedan nos cadros de persoal, coas limitacións e consonte ás previsións establecidas nas disposicións orzamentarias en vigor.

Os postos de traballo da categoría de Técnico en Farmacia contarán cun código orzamentario específico.

Disposición transitoria primeira. Situación do persoal fixo que desempeña actualmente funcións de Técnicos en Farmacia.

1. O persoal fixo que, á entrada en vigor deste Decreto, se atope desempeñando postos de traballo cuxo contido funcional se corresponda coas funcións que no mesmo se asignan aos técnicos en farmacia permanecerá no seu exercicio. Unha vez que fiquen vacantes, por calquera das causas previstas legalmente, serán amortizados e se transformarán en prazas da categoría técnico en farmacia de conformidade co artigo quinto deste decreto.

2. O persoal fixo a que se refire o parágrafo anterior, que ostentando o título de Técnico en farmacia, superase o primeiro proceso selectivo que se convocase para persoal desta categoría e no intre da elección de destino permanecese no mesmo, poderá optar pola transformación do seu posto de traballo en praza da categoría técnico en farmacia ou participar na elección de destino.

Disposición transitoria segunda. Situación do persoal temporal que desempeña actualmente funcións de técnico en farmacia.

1. As prazas desempeñadas por persoal temporal que, á entrada en vigor deste Decreto se atope exercendo, con carácter fundamental, as funcións que se atribúen á categoría de técnico en farmacia serán obxecto de convocatoria pública como prazas desta categoría no primeiro proceso selectivo que se celebre. O dito persoal permanecerá no seu desempeño ata que se produza o

seu cesamento pola toma de posesión dos aspirantes que superasen o proceso selectivo ou pola cobertura regulamentaria por persoal estatutario fixo da categoría técnico en farmacia.

2. O nomeamento do persoal con vínculo temporal en praza vacante que á entrada en vigor deste Decreto se atope desempeñando as funcións que na mesma se asignan aos técnicos en farmacia, e estea en posesión do título requirido para o acceso, será transformado polo nomeamento correspondente a dita categoría.

Disposición transitoria terceira. Valoración de servizos prestados

Os servizos prestados en desenvolvemento, con carácter fundamental, das funcións propias da categoría de Técnico en Farmacia, e debidamente certificados, terán a consideración de prestados en dita categoría nos procesos de selección, para persoal temporal ou fixo, que se formalicen para o acceso a prazas de dita categoría.

Disposicións derradeiras

Primeira.- Facúltase á Consellería de Sanidade e ao Servizo Galego de Saúde para adoptar as medidas pertinentes, no ámbito das súas competencias, para o desenvolvemento e aplicación do disposto no presente Decreto.

Segunda.- Este Decreto entrará en vigor aos vinte días da súa publicación no Diario Oficial de Galicia.